



## O'ZBEKISTON RESPUBLIKASI NAVOIY VILOYATI HOKIMINING QARORI

Navoiysh., IslomKarimovsh.k 77 A

2022 - yil 22 - oktabr

202-5-0-Q/22

Navoiy viloyat hokimligi

**Ўзбекистон Республикаси Вазирлар Маҳкамасининг 2022 йил 14  
октябрдаги “Давлат фуқаролик хизматчилари томонидан одоб-ахлоқ  
қоидаларига риоя этилишини таъминлаш бўйича қўшимча чора-  
тадбирлар тўғрисида”ги 595-сонли қарори ижроси тўғрисида**

“Давлат фуқаролик хизмати тўғрисида”ги Ўзбекистон Республикаси  
Қонуни, Вазирлар Маҳкамасининг 2022 йил 14 октябрдаги “Давлат  
фуқаролик хизматчилари томонидан одоб-ахлоқ қоидаларига риоя  
етилишини таъминлаш бўйича қўшимча чора-тадбирлар тўғрисида”ги 595-  
сонли сонли қарорига мувофиқ, “Маҳаллий давлат ҳокимияти тўғрисида”ги  
Ўзбекистон Республикаси Қонунининг 6-моддасига асосланиб,

### ҚАРОР ҚИЛАМАН:

1. Ўзбекистон Республикаси Вазирлар Маҳкамасининг 2022 йил 14  
октябрдаги “Давлат фуқаролик хизматчилари томонидан одоб-ахлоқ  
қоидаларига риоя этилишини таъминлаш бўйича қўшимча чора-тадбирлар  
тўғрисида”ги 595-сонли сонли қарори ижро учун қабул қилинсин.

2. Вазирлар Маҳкамасининг мазкур қарори билан қўйидагилар:

“Давлат фуқаролик хизматчилари одоб ахлоқининг намунавий  
қоидалари” (кейинги ўринларда – Одоб-ахлоқ қоидалари) ҳамда “Одоб-ахлоқ  
комиссияси тўғрисидаги намунавий низом” тасдиқланганлиги;

Одоб-ахлоқ қоидалари талабларининг бузилиши қонунчилик  
хужжатларига мувофиқ интизомий ва бошқа турдаги жавобгарликка тортиш

учун асос ҳисобланиши белгилаб қўйилганлиги инобатга олинсин.

### 3. Қуидагилар:

Навоий вилояти ҳокимлиги ходимлари одоб-ахлоқининг қоидалари 1-иловага мувофиқ;

Навоий вилояти ҳокимлиги одоб-ахлоқ комиссияси тўғрисида низом 2-иловага мувофиқ;

Навоий вилояти ҳокимлиги одоб-ахлоқ комиссияси таркиби 3-иловага мувофиқ тасдиқлансин.

### 4. Вилоят ҳокимининг ўринбосарлари, таркибий бўлинма раҳбарларига:

Навоий вилояти ҳокимлиги ходимлари одоб-ахлоқининг қоидаларига ҳокимлик ходимлари томонидан оғишмай риоя этилишини таъминлаш ҳамда назорат ўрнатиш ва кундалик фаолиятида амал қилиниши шарт бўлган ҳужжат сифатида мукаммал ўрганилишини таъминлаш;

ҳокимлик ходимларининг хизмат вазифаларига вижданан ва масъулият билан ёндошишларини таъминлаш, уларда фидоийлик, ҳалоллик ва қатъиятлик каби хислатларни шакллантириб бориш ҳамда улар орасида ҳар қандай ножӯя хатти-ҳаракатлар (ҳаракатсизлик) содир этилиши ҳолатларининг олдини олиш ва барҳам бериш чораларини кўриб бориш топширилсин.

### 5. Ҳудудий давлат органлари, туман (шаҳар) ҳокимлеклари ва бошқа ташкилотлар 2022 йил 25 октябрга қадар ўз фаолияти хусусиятларини ҳисобга олган ҳолда:

Одоб-ахлоқ қоидалари асосида ҳудудий ва таркибий бўлинмалар ходимлари учун мажбурий бўлган ходимларнинг идоравий одоб-ахлоқ қоидаларини ҳамда “Одоб-ахлоқ комиссияси тўғрисидаги намунавий низом” асосида Одоб-ахлоқ комиссияси тўғрисидаги низомни ва унинг таркибини тасдиқланишини;

ички меҳнат тартиб-қоидаларини ва бошқа идоравий ҳужжатларни ушбу қарорга мувофиқлаштирилишини таъминласин.

2022 йил 28 октябрга қадар ушбу банднинг ижроси бўйича амалга оширилган ишлар натижаси тўғрисида батафсил ахборотни тасдиқланган

хужжатларни илова қилган ҳолда вилоят ҳокимлигига тақдим этсин.

6. Вилоятдаги хўжалик бошқаруви органларига Одоб-ахлоқ қоидалари асосида ходимларнинг одоб-ахлоқ қоидаларини қабул қилиш тавсия этилсин.

7. Вилоят адлия бошқармаси (А.Сарабеков) Давлат хизматини ривожлантириш агентлиги Навоий вилояти филиали, худудий давлат органлари ва ташкилотлари билан биргаликда бир ой муддатда Вазирлар Маҳкамасининг қарори мазмун-моҳиятини давлат хизматчилари ўртасида тушунтириш мақсадида ўқув-семинарлари ташкил этсин.

8. Вилоят ҳокимининг 2016 йил 19 апрелдаги “Навоий вилояти, шаҳар ва туман ҳокимликлари ходимларининг одоб-ахлоқ қоидаларини тасдиқлаш тўғрисида”ги Қ-65-сонли қарори ўз кучини йўқотган деб ҳисоблансин.

9. Мазкур қарорнинг бажарилишини назорат қилиш вилоят ҳокимининг барча ўринбосарлари зиммасига юклансин.

Вилоят ҳокими в.б.



Н.Турсунов

Navoiy viloyat hokimining  
2022 yil 22 oktabrdagi  
202-5-0-Q/22-son qaroriga  
1-ilova

## **Навоий вилоят ҳокимлиги ходимларининг одоб-ахлоқ**

### **ҚОИДАЛАРИ**

#### **1-боб. Умумий қоидалар**

1. Навоий вилоят ҳокимлиги ходимларининг одоб-ахлоқ қоидалари (кейинги ўринларда - Одоб-ахлоқ қоидалари) вилоят ҳокимлиги ходимларининг (кейинги ўринларда - ходимлар) касбий маданияти, хизмат фаолияти давомида ҳамда хизматдан ташқари вақтда одоб-ахлоқи, ташки кўриниши ва кийиниш услугбининг қоидаларини белгилайди.

Одоб-ахлоқ қоидалари давлат хизматида юксак касбий маданиятни шакллантириш, жамоатчилик онгига давлат хизматига бўлган ҳурмат ва ишончни ошириш ҳамда ходимларнинг ахлоқ қоидаларига зид бўлган хатти-ҳаракатларининг олдини олишга қаратилган.

2. Ходимлар ўз касбий фаолиятини қўйидаги принциплар асосида амалга ошириши шарт:

қонунийлик;

Ватанга садоқат ва хизмат вазифасига фидойилик, юкланган функционал вазифаларини тўлиқ бажариш, ижро интизомига қатъий риоя этиш;

фуқаролар ҳуқуqlари, эркинликлари ва қонуний манфаатларининг устуворлиги;

давлат ва жамият манфаатларига содиклик;

адолатлилик, ҳалоллик ва холислик;

коррупциявий ҳолатларга муросасиз муносабатда бўлиш ва қарши курашиш;

хизмат сирини қатъий сақлаш;

манраб ваколатларини суиистеъмол қилмаслик;

манфаатлар тўқнашувига йўл қўймаслик.

3. Ходимлар меҳнат фаолияти давомида ва ишдан ташқари вақтда хулқатворнинг қуидаги умумий қоидаларига амал қилиши лозим:

давлат хизматининг обрўсига путур етказиши мумкин бўлган хатти-харакатлардан тийилиш, ахлоқ нормаларига доимий риоя қилиш;

масъулият, касбига садоқат ва ҳалолликни кундалик шиорга айлантириш;

мураккаб вазифаларни бажаришда ҳамкасларига қўмаклашиш;

хушмуомалалик, эътиборлилик ва ҳушёрлик билан фуқароларда давлатта нисбатан ишонч ва ҳурмат ҳиссини уйғотиш;

оиласида соғлом муҳитни таъминлаб, оила аъзоларига доимий ғамхўр бўлиш, фарзандларида ватанпарварлик ва бошқа юксак ахлоқий фазилатларни шакллантириш;

фуқароларнинг ижтимоий қелиб чиқиши, иқтисодий аҳволи ва бошқа омиллардан қатъий назар, улар билан бир хил, самимий, одоб доирасида муносабатда бўлиш;

жамиятда ахлоқнинг умумэътироф этилган қоидаларига амал қилиш.

4. Ходимлар ўз ваколатларини амалга ошираётганда Ўзбекистон Республикасининг Конституцияси ва қонунларига, “Давлат фуқаролик хизмати тўғрисида”ги Ўзбекистон Республикасининг Қонунига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Вазирлар Маҳкамасининг қарорлари ва фармойишларига, ушбу Одоб-ахлоқ қоидаларига ва бошқа қонунчилик ҳужжатларига амал қилади.

5. Ходимлар Одоб-ахлоқ қоидаларига риоя қилиш мажбуриятига, фуқаролар эса ходимлардан мазкур қоидаларга мос бўлган касбий маданиятни талаб қилиш хуқуқига эга.

6. Ходимларнинг Одоб-ахлоқ қоидаларига риоя этиши уларнинг фаолияти ҳамда хизматдаги ахлоқини баҳолашнинг асосий мезонларидан бири ҳисобланади.

Ходимлар томонидан Одоб-ахлоқ қоидаларига риоя қилиниши ҳолати

уларни келгусида юқори лавозимларга тайинлаш ва раҳбар кадрлар захирасини шакллантиришда ҳисобга олинади.

## **2-боб. Касбий маданиятга оид умумий одоб-ахлоқ қоидалари**

### **7. Ходимлар:**

фуқароларнинг жинси, ирқи, миллати, фуқаролиги, тили, дини, ижтимоий келиб чиқиши, эътиқоди, шахсий ва ижтимоий мавқеи камситилишига олиб келувчи таъсир чоралари ва ҳаракатлар (ҳаракатсизлик)га йўл қўймаслиги;

ҳалол, адолатли ва камтар бўлиши, фуқаролар билан мулоқотда хушмуомала, вазмин ва самимий муносабатни намойиш қилиши;

жисмоний ва юридик шахсларнинг ҳуқуқлари ва қонуний манфаатларига дахлдор қарорларни қабул қилишда қонунийликни, адолатлиликни ва шаффоффликни таъминлаши;

давлат ва жамият манфаатларига зарар етказувчи, вилоят ҳокимлиги фаолияти самарадорлигини пасайтирадиган ҳаракатлар (ҳаракатсизлик)дан тийилиши;

ўзининг хатти-ҳаракати ва ахлоқи туфайли жамоатчиликнинг танқидига учрамаслик чораларини кўриши, танқид учун таъқибга йўл қўймаслиги, асосли ва конструктив танқиддан ўз фаолиятидаги камчиликлар ҳамда нуқсонларни бартараф этиш йўлида фойдаланиши;

давлат органлари ва ташкилотлари, давлат хизматчилари ва бошқа шахсларга ўз хизмат мавқеидан фойдаланган ҳолда шахсий масалалар юзасидан таъсир ўтказмаслиги;

ўз хизмат ваколатларини жисмоний ва юридик шахсларнинг манфаатларини кўзлаб бажариш ёки бажармаслик эвазига улардан бирон-бир мукофот, фойда ёки совғалар олмаслиги;

давлат мулкининг бут сақланишини таъминлаши, ўзига ишониб топширилган давлат мулкидан фақат хизмат мақсадларида фойдаланиши;

хизмат интизомига қатъий риоя қилиши, иш вақтидан одилона ва самарали фойдаланиши;

қонун билан интизомий, маъмурий ва жиноий жавобгарлик назарда тутилган ҳуқуқбузарлик ва бошқа хатти-ҳаракатларга йўл қўймаслиги;

касб этикаси ва ишчанлик услубига риоя этиши;

сиёсий партиялар, жамоат бирлашмалари ва бошқа нодавлат ташкилотлари манфаатлари йўлида хизмат мавқеи ва имкониятларидан фойдаланмаслиги керак.

8. Ходимлар ўзига бўйсунувчи ходимлардан улар меҳнат вазифасини бажараётган пайтда партия номидан сиёсий фаолият билан шуғулланишини талаб қилиши, сиёсий партиялар, жамоат бирлашмалари ва бошқа нодавлат ташкилотлари фаолиятида иштирок этишга даъват этиши ёки мажбурлашига йўл қўйилмайди.

### **З-боб. Хизмат фаолиятига оид одоб-ахлоқ қоидалари**

9. Ходимлар хизмат фаолияти давомида қуидагиларга мажбур:

Ўзбекистон Республикасининг Конституцияси, қонунлари ва бошқа қонунчилик ҳужжатларига сўзсиз риоя этиши;

мамлакат шаънини эъзозлаш, давлат сиёсатига содик бўлиш;

ташқи сиёсат соҳасида давлат манфаатларини қатъий ҳимоя қилиш;

ўз хизмат вазифаларини вижданан, ҳалол ва юксак профессионал даражада бажариш, расмиятчилик, сохтакорлик ва суиистеъмолчиликка йўл қўймаслик

хизмат мажбуриятларини самарали бажариш учун зарур бўлган билим ва кўникмаларни доимий асосда ошириш;

юқори давлат органлари ва ташкилотлари ҳамда мансабдор шахсларининг ўз ваколатлари доирасида қабул қилган қарорлари ҳамда берилган топшириқларни ўз вақтида ва сифатли бажариш;

ишлаб чиқилаётган норматив-хуқуқий ва бошқа ҳужжатларга бирон-бир шахс, гурух ёки идоралар манфаати нуқтаи назаридан ёндашмаслик ҳамда уларнинг манфаатлари ифода этилишига йўл қўймаслик;

ҳар қандай қонунбузилишига, айниқса, коррупция ҳолатларига қарши

муросасизлик билан курашиш;

хизмат сафарлари, назорат тадбирлари давомида меҳнат фаолияти билан боғлиқ бўлган ҳар қандай турдаги сарф-харажатларни бошқа шахслар ҳисобидан амалга оширмаслик;

ходимлар ёки бошқа шахслар томонидан жиноят ёки бошқа хукуқбузарлик содир этишга ундовчи мурожаатлар ҳақида, шунингдек, ҳамкаслари томонидан содир этилган ёки тайёргарлик кўрилаётган қонунбузилишлар ҳақида ўзининг раҳбарига зудлик билан маълум қилиш;

чет эл фуқаролари билан алоҳида белгиланган тартибга зид равиша бевосита ёки бошқа шахслар орқали мулоқотга киришмаслик;

ўз хизмат мажбуриятларини бажараётганда фуқаролар ва бошқа шахсларни камситмаслик, уларнинг таъсиридан сақланиш, фуқаролар хукуқлари, мажбуриятлари ва қонуний манфаатларини ҳисобга олиш;

ўз хизмат мажбуриятларини вижданан бажаришга тўсқинлик қилиши мумкин бўлган хатти-ҳаракатлардан сақланиш;

давлат сири, қонун билан қўриқланадиган ва хизматга оид бошқа маълумотларнинг ошкор этилмаслигини таъминлаш юзасидан барча чораларни кўриш, улардан қонунга зид равиша фойдаланмаслик;

ахборотларни тарқатиш қоидаларига риоя қилиш, Интернет жаҳон ахборот тармоғи ва ахборот коммуникация воситаларидан фойдаланишда ахборот хавфсизлигини таъминлашнинг белгиланган тартибига амал қилиш;

бириктирилган хизмат компьютери ҳамда электрон ташувчиларидағи хизматга оид маълумотларнинг хавфсиз сақланишини таъминлаш ва уларни бошқа шахсларга тарқатилишининг олдини олиш чораларини кўриш;

ижтимоий тармоқларда давлат органлари ва ташкилотлари ҳамда мансабдор шахслар фаолиятини мухокама қиласлик, ахлоққа зид ибораларни ишлатмаслик, мамлакатда амалга оширилаётган ислоҳотларга нисбатан одамларда ишончсизлик кайфиятини юзага келтириши мумкин бўлган материалларни жойлаштирумаслик;

фуқаролар ва ҳамкасларининг шаъни ва қадр-қимматига доғ туширувчи маълумотлар, тұхмат, иғво ва үйдирмаларни тарқатмаслик;

меҳнат ва ижро интизоми, ички тартиб қоидаларига, шунингдек,

телефонда сўзлашиш ва кийиниш маданиятига қатъий риоя этиш;

ўзига ишониб топширилган мулкка ва молиявий маблағларга эҳтиёткорлик ва тежамкорлик билан муносабатда бўлиш;

жамоада соғлом маънавий муҳитни сақлаш чораларини кўриш;

жисмоний ва юридик шахсларнинг мурожаатларини қонунда белгиланган тартибда ҳамда муддатларда қонуний, асосли ваadolatli ҳал қилиш;

мехнат жамоасида ишчанлик муҳитини шакллантириш ва уни мустаҳкамлашга кўмаклашиши;

мехнат жамоасида ҳамкасларининг шаъни ва қадр-қимматини обрўсизлантирадиган шахсий ва касбий фазилатларини муҳокама қилишдан тийилиши керак.

#### 10. Раҳбарлар қўйидагиларга мажбур:

бўйсунувидаги ходимларига професионализм, ҳалоллик, холислик ва адолатлиликда ўrnak бўлиш;

жамоада соғлом маънавий муҳит ва ишchan қайфиятни шакллантириш;

ходимларини қонунга хилоф хатти-ҳаракатларни амалга оширишга ундамаслик ҳамда улардан бундай ҳаракатларни бажаришни талаб қилмаслик;

кадрларни маҳаллийчилик, уруғ-аймоқчилик, таниш-билишчилик ёки шахсий садоқат белгилари бўйича танлаш, тайинлаш ёки тавсия этишга йўл қўймаслик;

жамоада гурухбозлик ва фаворитизм (айрим ходимларни яқин олиш ва қўллаб-қувватлаш) кўринишларига йўл қўймаслик, шунингдек, хизмат вазифаларини бажариш жараёнида бошқа салбий омилларнинг олдини олиш;

ходимларнинг фаолиятига баҳо беришда қонуний, асосли ваadolatli қарорлар қабул қилиш;

ходимлар томонидан коррупция ва бошқа сустеъмолчиликлар содир этилишининг олдини олиш чораларини кўриш;

бўйсунувидаги ходимларини ҳуқуқий ва ижтимоий жиҳатдан ҳимоя қилиш чораларини кўриш;

ваколати доирасида шартномалар тузиш, танловлар ўтказиш ёки розилик бериш масалаларига холис, адолатли ва қонуний ёндашиш.

11. Раҳбарлар бўйсунувидаги ходимларига қўпол муомалада бўлиши, ҳақорат қилиши, шахсиятига тегиши, уларга асоссиз танбех бериши ёки айблаши ҳамда камситиши мумкин эмас.

#### **4-боб. Хизматдан ташқари одоб-аҳлоқ қоидалари**

12. Ходимлар ишдан бўш вақтларида умумқабул қилинган аҳлоқ нормаларига риоя қилишлари ва уларга зид бўлган хулқ-атвор ва хатти-ҳаракатлардан ўзларини тийишлари шарт.

13. Ходимлар ишдан ташқари вақтда қуидагиларга мажбур:

миллий урф-одат, қадрият ва анъаналарга ҳурмат билан муносабатда бўлиш;

дабдабабозлик, шухратпарастлик, гурухбозлик, майшатбозлик, ичкилиkbозлик ва бошқа салбий иллатларга йўл қўймаслик;

расмий эълон қилинган маълумотлардан ташқари давлат хизмати фаолиятига оид масалаларни муҳокама қилмаслик;

жамоат жойларида (кафе, ресторан ва бошқа кўнгилочар масканларда) ўзини тутиш қоидаларига риоя этиш, атрофдагиларнинг эътиборини тортувчи ортиқча ва салбий ҳаракатларга йўл қўймаслик;

жамоат тартиби ва хавфсизлигига қарши қаратилган хатти-ҳаракатларни содир этмаслик, мазкур ноқонуний ҳаракатларга бошқаларни жалб этмаслик ёки даъват қилмаслик;

хизмат мажбуриятларини бажариш билан боғлиқ бўлган идора ва ташкилотлар раҳбар ва ходимларидан, бошқа мансабдор шахслардан қимматбаҳо совға олмаслик;

хизмат гувоҳномаларини сақлаш ва фойдаланиш тартибиغا қатъий риоя этиш, улардан хизматга алоқадор бўлмаган ҳолатларда фойдаланмаслик, шу жумладан, ваколатли шахсларга хизмат гувоҳномасини кўрсатиб, мавқеини сунистехмол қилмаслик;

хизмат автотранспорт воситаларидан хизмат фаолиятидан ташқари ҳолатларда шахсий ва бошқа мақсадларда фойдаланмаслик;

иш фаолияти билан боғлиқ маълумотларни ишга алоқадор бўлмаган бошқа шахслар иштирокида муҳокама қилмаслик;

шахсий транспорт воситаларидан фойдаланишда белгиланган тартибга амал қилиш, йўл ҳаракати қоидаларига қатъий риоя этиш;

тадбиркорлик ёки ҳак тўланадиган бошқа фаолият билан (педагогик, илмий ва ижодий фаолиятдан ташқари) шуғулланмаслик, Ўзбекистон Республикаси қонунлари ва Ўзбекистон Республикаси Президенти қарорларида назарда тутилган ҳоллар бундан мустасно;

ўзи фаолият юритаётган ташкилот ҳамда давлат хизматига доғ туширувчи хатти-ҳаракатлардан тийилиши;

ташқи кўринишини белгиланган меъёрлар доирасида сақлаш, камтарона кийиниши, атрофдагиларнинг эътиборини ўзига ортиқча жалб қиласдиган тарзда кийинмаслик.

## **5-боб. Жамоатчилик, оммавий ахборот воситалари вакиллари билан муносабатларга оид одоб-ахлоқ қоидалари**

14. Ходимлар оммавий ахборот воситалари билан ўзаро ҳамкорлик қилиши, вилоят ҳокимлиги фаолиятини оммавий ахборот воситаларида ёритилишига кўмаклашиши керак.

15. Давлат сиёсати ёки вилоят ҳокимлиги фаолияти тўғрисидаги оммавий баёнотлар вилоят ҳокими ёки мазкур йўналиш бўйича ваколатли мансабдор шахс томонидан амалга оширилади.

16. Қуйидаги ҳолларда оммавий баёнот берилиши мумкин эмас:

оммавий баёнот матни ва мазмуни давлат сиёсати ёки вилоят ҳокимлиги фаолиятига алоқадор бўлмаса;

оммавий баёнотда келтириладиган ахборотлар давлат сирлари билан боғлиқ бўлса;

оммавий баёнот бошқа давлат органлари ва ташкилотлари нуфузини

пасайтириш ёки уларнинг мансабдор шахсларини камситишга йўналтирилган бўлса.

17. Давлат хизматида жамоатчилик назоратини таъминлаш мақсадида жамоатчилик томонидан вилоят ҳокимлиги фаолиятига оид айблов ёки танқид билдирилган тақдирда, вилоят ҳокимлиги унга нисбатан билдирилган айблов ёки танқидга оммавий изоҳ ёхуд раддия бериши лозим.

18. Агар оммавий баёнотда фуқароларнинг шаъни ҳамда қадр-қимматини камситадиган иборалар бўлса, ходим ўз фикрларининг янглишлиги ёки нотўғрилигини тан олиши ҳамда шаъни, қадр-қимматига ва ишchanлик обрўсига дахл қилинган фуқародан, агар қонунчилик ҳужжатларида бошқа оқибатлар назарда тутилмаган бўлса, кечирим сўраши шарт.

#### **6-боб. Хизмат фаолиятидаги ташқи кўриниш ва кийиниш услугига оид одоб-ахлоқ қоидалари**

19. Ходимларнинг хизмат фаолиятидаги ташқи кўриниши ва кийиниш услуги фуқароларнинг вилоят ҳокимлиги фаолиятига хурматини, шу жумладан давлат хизматининг нуфузини оширишга хизмат қилиши керак.

20. Ходимларнинг ташқи кўриниши меҳнат шароитлари ва хизмат турига қараб, хизмат мажбуриятларини бажариши вақтида фуқароларнинг давлат ташкилотига нисбатан ҳурмат билан муносабатда бўлишига кўмаклашиши, умумий қабул қилинган иш услугига мувофиқ бўлиши ва расмийлик, холислик, камтарлик ва интизомни намоён этиши лозим.

21. Ходимларнинг иш жойида ташқи кўриниши ва кийиниш услугига оид қўшимча талаблар идоравий одоб-ахлоқ қоидалари ҳамда ички меҳнат тартибида белгиланиши мумкин.

#### **7- боб. Манфаатлар тўқнашуви**

22. Ходимлар мансаб ёки хизмат мажбуриятларини бажариш вақтида манфаатлар тўқнашувига олиб келадиган ёки олиб келиши мумкин бўлган

шахсий манфаатдорликка йўл қўймаслиги керак.

23. Манфаатлар тўқнашуви юзага келган тақдирда ходимлар ўзининг раҳбарини дарҳол хабардор қилиши шарт.

Манфаатлар тўқнашуви мавжудлиги тўғрисида маълумотлар олган раҳбар бу тўқнашувнинг олдини олиш ёки уни бартараф этиш юзасидан ўз вақтида чоралар кўришга мажбур.

## **8- боб. Ходимларнинг манфаатини ҳимоя қилиш**

24. Ходимларни хизмат вазифаларини бажариш билан боғлиқ таҳдид, ҳақорат, тухмат ва қонунга хилоф бошқа хатти-ҳаракатлардан ҳимоя қилиш вилоят ҳокими томонидан амалга оширилади.

25. Зиммасига юклатилган вазифаларни бажаришга тўсқинлик қилиш, жиноят ёки бошқа ҳуқуқбузарлик содир этишга оғдиришга қаратилган мурожаатлар, шунингдек, ҳамкаслари томонидан содир этилган ёки содир этишга тайёргарлик кўрилаётган қонунбузилишлар ҳақида хабар берган ходимларни вужудга келиши мумкин бўлган таҳдид ва хавф-хатарлардан ҳимоя қилиш чоралари кўрилади.

## **9-боб. Одоб-ахлоқ қоидаларига риоя этилишини назорат қилиш**

26. Ходимлар томонидан одоб-ахлоқ қоидаларига риоя этилиши устидан назорат вилоят ҳокимлиги ташкилий-кадрлар гурухи ёки одоб-ахлоқ комиссияси, шунингдек маҳсус ваколатли давлат органи томонидан амалга оширилади.

27. Навоий вилояти ҳокимлигига лавозимга тайинланган ходимлар вилоят ҳокимлиги ташкилий-кадрлар гурухи томонидан мазкур Одоб-ахлоқ қоидалари билан тилхат асосида имзо қўйдирган ҳолда таништирилади.

28. Мазкур одоб-ахлоқ қоидаларини бузиш ҳолатлари бўйича хизмат текшируви вилоят ҳокимининг кўрсатмасига мувофиқ одоб-ахлоқ комиссияси томонидан ўтказилади.

Хизмат текширувини ўтказиш тартиби вилоят ҳокимлиги томонидан

белгиланади.

## **10-боб. Одоб-ахлоқ қоидаларига риоя этмаганлик учун жавобгарлик**

29. Ходимлар томонидан Одоб-ахлоқ қоидаларига риоя этмаганлик ҳолати уларга нисбатан ахлоқий ва интизомий таъсир чораларини қўллаш учун асос бўлади.

30. Одоб-ахлоқ қоидаларига риоя этмаганлик учун одоб-ахлоқ комиссияси томонидан ходимларга қўйидаги ахлоқий таъсир чоралари қўлланилади:

огоҳлантириш;

узр сўраш ёки расмий узрнома келтиришни талаб қилиш;

вилоят ҳокимлиги йиғилишларида танбех бериш.

31. Одоб-ахлоқ комиссияси ходимга нисбатан интизомий таъсир чорасини қўллаш учун вилоят ҳокимиға тақдимнома киритиши мумкин.

Одоб-ахлоқ комиссияси одоб-ахлоқ қоидалари вилоят ҳокими томонидан бузилган тақдирда, уларга нисбатан тегишли чора кўриш масаласи юзасидан таклифларни Ўзбекистон Республикаси Президенти Администрацияси раҳбарига юборади.

32. Ходимнинг одоб-ахлоқ қоидаларини бузиши уни қонунга мувофиқ интизомий ва бошқа жавобгарликка тортиш учун асос бўлади.

## **11-боб. Якуний қоида**

33. Вилоят ҳокимлиги фаолиятининг ўзига хос ҳусусиятларидан келиб чиққан ҳолда мазкур одоб-ахлоқ қоидаларига мувофиқ ўз идоравий одоб-ахлоқ қоидаларини тасдиқлайди.

Navoiy viloyat hokimining  
2022 yil 22 oktabrdagi  
202-5-0-Q/22-son qaroriga  
2-ilova

## **Навоий вилоят ҳокимлиги одоб-ахлоқ комиссияси тўғрисида НИЗОМ**

### **1-боб. Умумий қоидалар**

1. Ушбу низом Навоий вилояти ҳокимлиги одоб-ахлоқ комиссияси (кейинги ўринларда - Комиссия) фаолиятини тартибга солади.

2. Комиссия вилоят ҳокимлиги ходимлари (кейинги ўринларда - ходимлар) томонидан одоб-ахлоқ қоидаларига риоя этишини назорат қилиш, уларнинг ахлоқ нормаларига зид бўлган хатти-харакатларини олдини олиш ва одоб-ахлоқ қоидаларига риоя этиш билан билан боғлиқ низоларни қўриб чиқиш мақсадида тузилади.

3. Комиссия фаолияти Ўзбекистон Республикасининг Конституцияси ва қонунларига, “Давлат фуқаролик хизмати тўғрисида”ги Ўзбекистон Республикасининг Қонунига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармон, қарор ва фармойишларига, Вазирлар Маҳкамасининг қарорлари ва фармойишларига, Ўзбекистон Республикаси давлат хизматчилари одоб-ахлоқининг қоидаларига, ушбу низомга ва бошқа қонунчилик ҳужжатларига мувофиқ амалга оширилади.

4. Комиссия Комиссия раиси, котиби ва аъзоларидан иборат бўлиб, умумий сони беш нафардан кам бўлмаслиги ва тоқ сонда бўлиши лозим.

Комиссия таркибига тажрибали, меҳнат жамоасида обрў-эътиборга сазовор бўлган ходимлар киритилади.

Комиссия таркиби вилоят ҳокими қарори билан тасдиқланади ва доимий равишда фаолият юритади.

Комиссия таркибига комиссия томонидан қабул қилинадиган қарорларга таъсир кўрсатиш мумкин бўлган манфаатлар тўқнашуви эҳтимолини назарда тутган ҳолда ўзгартириш киритилади.

## 2-боб. Комиссиянинг асосий вазифалари ва функциялари

5. Комиссиянинг асосий вазифалари қўйидагилардан иборат:
- ходимларнинг идоравий одоб-ахлоқ қоидаларини ишлаб чиқиш;
  - ходимлар томонидан одоб-ахлоқ қоидаларига риоя этилиши масалаларини кўриб чиқиш, хизмат текширувларини ўтказиш;
  - ходимлар ўртасида ахлоқ нормаларига зид бўлган хатти-ҳаракатларнинг олдини олишга қаратилган комплекс чора-тадбирларни амалга ошириш;
  - жисмоний ва юридик шахсларнинг ходимларнинг хатти-ҳаракатларига доир мурожаатларини кўриб чиқиш;
  - ходимларнинг шаъни ва қадр-қимматини ҳимоя қилиш билан боғлиқ масалаларни кўриб чиқиш;
  - ходимларнинг одоб-ахлоқ қоидаларини такомиллаштириш юзасидан таклифлар ишлаб чиқиш;
  - ходимлар томонидан одоб-ахлоқ қоидаларига риоя этилиши ҳолатини таҳлил қилиш, натижалари ҳақида вилоят ҳокими ва жамоатчиликни хабардор қилиб бориш.

### 6. Комиссия ўз ваколатлари доирасида:

- ходимлар томонидан одоб-ахлоқ қоидаларига риоя этилиши устидан назоратни амалга оширади;
- ходимлар томонидан одоб-ахлоқ қоидаларининг бузилиши билан боғлиқ масалалар юзасидан хулосалар тайёрлайди;
- ходимларнинг одоб-ахлоқ қоидалари билан боғлиқ масалаларини кўриб чиқиш жараёнида зарур ахборотни сўраб олади;
- кўриб чиқиш учун киритилган масалаларни ҳал этиш учун Комиссия мажлисларига эксперtlар ва мутахассисларни жалб қиласди;
- одоб-ахлоқ қоидаларига оид масалалар юзасидан ходимларга тегишли маслаҳат ва тушунтиришлар беради;
- зарур ҳолларда, Комиссияда кўриб чиқилган масалалар бўйича

ходимларни интизомий жавобгарликка тортиш юзасидан вилоят ҳокимига таклиф киритади.

7. Комиссия ҳокимликнинг таркибий бўлинмалари, бошқа давлат органлари ва ташкилотлари, мансабдор шахслари ва жамоатчилик билан ҳамкорлик қиласиди.

8. Комиссия фаолиятини ташкил қилиш ва ходимлар томонидан одобрахлоқ қоидаларининг бузилиши билан боғлиқ масалаларни кўриб чиқиш ушбу низомга иловада келтирилган схемага мувофиқ амалга оширилади.

### **3-боб. Комиссия фаолиятини ташкил этиш**

9. Комиссия мажлислари заруриятга қараб ўтказилади.

Комиссия мажлислари очиқ тарзда ўтказилади. Зарур бўлган ҳолларда Комиссия ёпиқ мажлис ўтказиш тўғрисида қабул қилиши мумкин.

10. Комиссия мажлисини Комиссия раиси, у йўқлигига эса, унинг топшириғига биноан Комиссия аъзоларидан бири олиб боради. Комиссия мажлисида баённома юритилади, у раислик қилувчи ва Комиссия котиби томонидан имзоланади.

11. Комиссия мажлислари, агар уларда Комиссия аъзолари умумий сонининг камидан учдан икки қисми ҳозир бўлса, ваколатли ҳисобланади.

12. Комиссиянинг навбатдаги мажлиси тўғрисида унинг раиси Комиссия аъзоларига ёзма равишда, қоида тариқасида, камидан икки кун олдин хабар қиласиди, шунингдек мажлиснинг бошқа иштирокчиларини олдиндан хабардор этади.

13. Комиссиянинг қарорлари мажлисда қатнашган Комиссия аъзоларининг кўпчилик овози билан қабул қилинади. Овозлар teng бўлган ҳолларда Комиссия раисининг овози ҳал қилувчи овоз ҳисобланади.

Комиссиянинг қарорлари Комиссия раиси томонидан имзоланади.

14. Комиссия раиси:

Комиссия ишини ташкил этади;

Комиссия мажлисларини чақиради ва ўтказади;

Комиссия аъзоларига топшириқлар беради;

ҳокимликнинг таркибий бўлинмалари, бошқа давлат органлари ва ташкилотлари, мансабдор шахслар ва жамоатчилик билан бўлган муносабатларда Комиссия номидан иш юритади;

Комиссия мажлисларида Комиссия фаолияти тўғрисидаги ахборот билан сўзга чиқади;

Ҳар йили вилоят ҳокимига Комиссия фаолияти тўғрисида хисобот тақдим этади.

#### 15. Комиссия котиби:

Комиссиянинг фаолиятини ташкилий-техник жиҳатдан таъминлаш масалаларини ҳал қиласди;

Комиссиянинг навбатдаги мажлисига барча зарур материаллар ўз вақтида тайёрланишини таъминлайди, ходимлардан зарур ҳужжатлар ва маълумотларни сўраб олади;

кун тартибига мувофиқ Комиссия мажлислари ўтказилишини ташкил этади;

Комиссиянинг аъзоларини ва таклиф этилган шахсларни Комиссия мажлиси ўтказиладиган жой, сана ва вақт ҳамда кун тартибига киритилган масалалар ҳақида хабардор қиласди;

Комиссия мажлисининг баённомасини расмийлаштиради ва тасдиқланган баённоманинг манфаатдор шахсларга жўнатилишини таъминлайди.

#### 16. Комиссия аъзоси:

Комиссия томонидан кўриб чиқиладиган барча масалалар бўйича овоз беришга;

Комиссиянинг кўриб чиқиши учун масалалар ва таклифлар киритишга;

қарорлар тайёрланишида, муҳокамасида, қабул қилинишида, шунингдек уларнинг амалга оширилишини ташкил этишда ҳамда бажарилишини назорат қилишда иштирок этишга;

кўриб чиқилаётган масалага доир ҳужжатлар, маълумотномалар ва бошқа зарур ахборот билан танишишга;

Комиссия қарорига рози бўлмаган тақдирда ўз нуқтаи назарини баён этишга ҳақли.

17. Комиссияси аъзоси Комиссия мажлисида ҳозир бўлиши ва ўзига юклатилган мажбуриятларни бажариши шарт.

Комиссия аъзоси Комиссия мажлисида ҳозир бўлиш имкони бўлмаганда Комиссия раисини олдиндан хабардор этиши лозим.

18. Комиссия мажлисида курилаётган масалалар Комиссия раиси, котиби ва аъзоларига бевосита ёки билвосита боғлиқ бўлган тақдирда ўзини ўзи рад қилиши шарт.

#### **4-боб. Ходимлар томонидан одоб-ахлоқ қоидалари бузилишининг олдини олиш (профилактика) чораларини куриш**

19. Комиссия вилоят ҳокимлиги ташкилий-кадрлар гурухи билан биргалиқда мунтазам равишда ходимлар томонидан одоб-ахлоқ қоидаларига риоя этилиши ва уларнинг бузилишини олдини олишга қаратилган қуийдагиларни назарда тутувчи профилактик комплекс чора-тадбирларни амалга оширади:

ходимларда юксак касбий маданиятни, жамоада соғлом маънавий муҳит ва ишчан кайфиятни шакллантириш;

ходимлар “ҳалоллик ваксинаси” билан эмлаш, яъни ҳалолликни уларнинг онгига сингдириш, маърифат орқали уларда коррупцияга қарши муросасиз муносабатда бўлиш кайфиятини шакллантириш;

вилоят ҳокимлигига таникли зиёлилар, ижодкорлар, маънавият ва маърифат соҳасининг кўзга кўринган намоёндалари, ўз соҳасида юксак натижаларга эришган меҳнат фахрийларини жалб қилган ҳолда, учрашувлар ташкил қилиб бориш;

ходимларнинг касбий ва бошқарув қўнимларни ўсишини, шунингдек уларнинг малакасини доимий равишда оширишни, улар томонидан одоб-ахлоқ қоидаларига риоя этишларини таъминлаш мақсадида уларнинг билимлари ва малакасини доимий такомиллаштириш ишларини таъминлаш;

ходимларнинг иқтисодий билимларини, ҳукуқий саводхонлигини,

хуқуқий маданияти ва хуқуқий онгини, интеллектуал ва маънавий ривожланишини ошириш мақсадида иқтисодий ва хуқуқий ўқишлиар ташкил этиш;

янги ишга қабул қилинган ходимларни одоб-ахлоқ қоидалариға қатъий риоя қилиш борасида стажировкадан ўтказиш ва улар билан профилактик сұхбатлар ташкил қилиш;

ходимларни малака ошириш курсларига, халқаро семинарлар, конференсиялар ва шу каби бошқа тадбирларга юбориш, улар томонидан ўз касбий даражаси ва ахлоқий сифатларини мустақил оширишлари учун шартшароит яратып бериш.

20. Комиссия ходимлар томонидан одоб-ахлоқ қоидалари бузилишининг олдини олиш (профилактика) борасидаги ўз фаолиятини Комиссия томонидан тасдиқланадиган чораклик иш режалари асосида олиб боради.

21. Ходимлар томонидан одоб-ахлоқ қоидалари бузилишининг олдини олиш (профилактика) чоралари Комиссия томонидан вилоят ҳокимлиги ҳамда касаба уюшмаси қўмитаси билан биргаликда ташкил этилади.

22. Ходимлар томонидан одоб-ахлоқ қоидалари бузилишининг олдини олиш (профилактика) чораларининг натижадорлиги йил якунлари бўйича ўтказиладиган Комиссия йиғилишида мухокама қилинади.

## **5-боб. Ходимлар томонидан одоб-ахлоқ қоидаларининг бузилиши билан боғлиқ масалаларни кўриб чиқиши тартиби**

23. Комиссия ходимлар томонидан одоб-ахлоқ қоидаларининг бузилишлари билан боғлиқ масалаларни:

вилоят ҳокимининг топшириғига кўра;

хуқуқни муҳофаза қилувчи органларнинг мурожаатига асосан;

ходимларнинг, шунингдек жисмоний ва юридик шахсларнинг мурожаатларига биноан;

ўз ташаббуси билан кўриб чиқади.

24. Комиссия мажлисига, ҳақиқий ҳолатларни аниқлаш ва холисона қарор қабул қилиш мақсадида, ўзига нисбатан масала кўриб чиқилаётган ходим, зарур бўлган ҳолларда эса, мурожаат қилувчи ва бошқа шахслар тақлиф этилади. Комиссия мажлисининг вақти ва жойи ҳақида тегишли равишда хабардор этилган шахсларнинг келмаслиги мурожаатни кўриб чиқиш учун тўсқинлик қилмайди.

25. Комиссия мажлисида:

кун тартибидаги масала ўқиб эшиттирилади;

вилоят ҳокими топшириғи ёки ходим томонидан одоб-ахлоқ қоидалари бузилганлиги тўғрисидаги мурожаат ўқиб эшиттирилади;

одоб-ахлоқ қоидаларига риоя этмаганликда айбланаётган ходим ва мурожаатчиларнинг тушунтиришлари эшитилади.

26. Ходим ўзининг ҳуқуқи, шаъни ва қадр-қимматига, ишчанлик обрўсига дахл қиласидаги мурожаат бўйича амалдаги қонунчилик ҳужжатларига мувофик ўзини ҳимоя қилишга, Комиссияга зарур материаллар ҳамда бошқа ахборотларни тақдим этишга ҳақли.

27. Мажлис якуни бўйича Комиссия ходимнинг ҳаракатларида одоб-ахлоқ қоидаларининг бузилиши фактининг мавжудлиги ёхуд мавжуд эмаслиги тўғрисида қарор қабул қиласиди.

28. Одоб-ахлоқ қоидалари бузилганлиги фақти аниқланган тақдирда Комиссия томонидан давлат хизматчиларига қўйидаги ахлоқий таъсир чоралари қўлланилади:

огоҳлантириш;

узр сўраш ёки расмий узрнома келтиришни талаб қилиш;

вилоят ҳокимлигининг йиғилишларида танбех бериш.

29. Комиссия ходимга нисбатан интизомий таъсир чорасини қўллаш учун вилоят ҳокимига тақдимнома киритиши мумкин.

30. Комиссия томонидан қўйидаги мурожаатлар кўриб чиқилмайди:

комиссияда олдин кўриб чиқилган мурожаат ва айнан шу мазмундаги тақрор мурожаатлар;

аноним мурожаатлар;

қонунда белгиланган бошқа талабларга мувофиқ бўлмаган мурожаатлар.

31. Комиссия қабул қилинган қарор ҳақида мурожаат қилувчига, ўзига нисбатан масала кўриб чиқилган ходимга ва вилоят ҳокимиға ёзма равища маълум қиласди.

32. Комиссия одоб-ахлоқ қоидалари вилоят ҳокими томонидан бузилган тақдирда уларга нисбатан тегишли чора кўриш масаласи юзасидан таклифларни Ўзбекистон Республикаси Президенти Администрацияси раҳбарига юборади.

33. Комиссиянинг қарори устидан вилоят ҳокимиға ёки судга шикоят қилиш мумкин.

34. Ходим томонидан одоб-ахлоқ қоидаларининг бузилиши ҳақидаги мурожаат унинг ташаббускори томонидан Комиссия қарори қабул қилингунига қадар қайтариб олиниши мумкин.

35. Тарафлар ярашган, шунингдек ходим ўз хоҳиши билан мурожаатчидан ошкора узр сўраган ҳолларда, унга нисбатан таъсир чоралари қўлланилмаслиги мумкин.

Навоий вилоят ҳокимлиги одоб-ахлоқ  
комиссияси тўғрисидаги низомга  
илова

**Одоб-ахлоқ комиссияси фаолиятини ташкил қилиш ва ходимлар  
томонидан одоб-ахлоқ қоидаларининг бузилиши билан боғлик  
масалаларни кўриб чиқиш**

**СХЕМАСИ**

Босқичлар	Субъектлар	Тадбирлар	Ижро муддати
<b>Комиссия фаолиятини ташкил этиш</b>			

1-босқич	Вилоят ҳокими	<p>1. Навоий вилояти ҳокимлиги одоб-ахлоқ комиссияси (кейинги ўринларда - Комиссия) Комиссия раиси, котиби ва аъзоларидан иборат таркибда, умумий сони камидан беш нафардан кам бўлмаган микдорда тоқ сонда шакллантириш.</p> <p>2. Комиссия таркибига тажрибали, меҳнат жамоасида обрў-эътиборга сазовор бўлган давлат хизматчиларини киритиш.</p> <p>3. Комиссия таркибини тасдиқлаш.</p>	Икки ҳафта муддатда
		<p>4. Комиссия таркибига комиссия томонидан қабул қилинадиган қарорларга таъсир кўрсатиши мумкин бўлган манфаатлар тўқнашуви эҳтимолини назарда тутган ҳолда ўзгаришиш киритилади.</p>	Заруратга кура
2-босқич	Комиссия раиси	<p>Комиссия ишини ташкил этади, комиссия мажлисларини чақиради ва ўтказади мажлисига раислик қиласди.</p> <p>Комиссия номидан иш юритади, Комиссия мажлисларида Комиссия фаолияти тўғрисидаги ахборот билан сўзга чиқади.</p> <p>Вилоят ҳокимига Комиссия фаолияти тўғрисида хисобот тақдим этади.</p>	<p>Маълумотлар киритилган вақтдан бошлаб</p> <p>Хар йили йил якуни бўйича</p>
	Комиссиянинг котиби	<p>Кун тартибига мувофиқ Комиссия мажлислари ўтказилишини ташкил этади. Комиссиянинг аъзоларини ва таклиф этилган шахсларни Комиссия мажлиси ўтказиладиган жой, сана ва вақт ҳамда кун тартибига киритилган масалалар ҳақида хабардор қиласди.</p> <p>Комиссиянинг фаолиятини ташкилий-техник жиҳатдан таъминлаш масалаларини ҳал қиласди, навбатдаги мажлисига барча зарур материаллар ўз вақтида тайёрланишини таъминлайди.</p> <p>Комиссия мажлисининг баённомасини расмийлаштиради ва тасдиқланган баённоманинг манфаатдор шахсларга жўнатилишини таъминлайди.</p>	<p>Мажлисдан камидан икки кун олдин</p> <p>Мажлисдан кейин бир кун муддатда</p>

## II. Одоб-ахлоқ қоидалари бузилишининг олдини олиш (профилактика) чораларини кўриш

1-босқич	Комиссия Вилоят ҳокимлиги таркибий бўлинмалари касаба уюшма қўмитаси	<p>Комиссия мунтазам равишда ходимлар томонидан одоб-ахлоқ қоидаларига риоя этилиши ва уларнинг бузилишининг олдини олишга қаратилган қўйидагиларни назарда тутувчи профилактик комплекс чоратадбирларни амалга оширади:</p> <p>ходимларда юксак касбий маданиятни, жамоада соғлом маънавий муҳит ва ишчан кайфиятни шакллантириш;</p> <p>ходимлар "ҳалоллик вакцинаси" билан эмлаш, яъни ҳалолликни уларнинг онгига сингдириш, маърифат орқали уларда коррупцияга қарши муросасиз муносабатда бўлиш кайфиятини шакллантириш;</p> <p>ҳокимлиқда таниқли зиёлилар, ижодкорлар, маънавият ва маърифат соҳаси, шунингдек диний соҳанинг кўзга кўринган намоёндалари, ўз соҳасида юксак натижаларга эришган меҳнат фахрийларини жалб қилган холда, учрашувлар ташкил килиб бориш;</p> <p>ходимларнинг касбий ва бошқарув кўнилмалари ўсишини, шунингдек уларнинг малакасини доимий равишда оширишни, улар томонидан одоб-ахлоқ қоидаларига риоя этишларини таъминлаш мақсадида уларнинг билимлари ва малакасини доимий ошириш ишларини таъминлаш;</p> <p>ходимларнинг иқтисодий билимларини, хуқукий саводхонлигини, хуқукий маданияти ва хуқукий онгини, интеллектуал ва маънавий ривожланишини таъминлаш мақсадида иқтисодий ва хуқукий ўқишлилар ташкил этиш; янги ишга қабул килинган ходимларни одоб-ахлоқ қоидаларига қатъий риоя қилиш борасида стажировкадан ўтказиш ва улар билан профилактик суҳбатлар ташкил қилиш;</p> <p>ходимларни малака ошириш курсларига, халқаро семинарлар, конференциялар ва шу каби бошқа тадбирларга юбориш, улар томонидан ўз касбий даражаси ва ахлоқий сифатларини мустақил оширишлари учун шарт-шароит яратиб бериш.</p>	Комиссия томонидан тасдиқланадиган чораклик иш режалари асосида
2-босқич	Комиссия	Ходимлар томонидан одоб-ахлоқ қоидалари бузилишининг олдини олиш (профилактика) чораларининг натижадорлигини Комиссия йиғилишида муҳокама қиласи.	Ҳар йили якунлари бўйича

### III. Одоб-ахлоқ қоидаларининг бузилиши билан боғлиқ

1-босқич	Комиссия	Комиссия ходимларнинг одоб-ахлоқ қоидаларини бузилишлари билан боғлиқ масалаларни: вилоят ҳокимининг топшириғига кўра; хукуқни муҳофаза қилувчи органларнинг мурожаатига асосан; ходимларнинг, шунингдек жисмоний ва юридик шахсларнинг мурожаатларига биноан; ўз ташаббуси билан кўриб чиқади.	Заруратга кўра
2-босқич	Комиссия раиси ва аъзолари	Комиссия мажлисида: кун тартибидаги масала ўқиб эшиттирилади; вилоят ҳокимининг топшириғи ёки ходим томонидан одоб-ахлоқ қоидалари бузилганлиги тўғрисидаги мурожаат ўқиб эшиттирилади; одоб-ахлоқ қоидаларига риоя этмаганликда айбланаётган ходим ва мурожаатчилар тушунтиришлари эшитилади.	Мажлис ўтказиладиган кун
	Ходим	Ўзининг хукуқи, шаъни ва қадр-қимматига, ишchanлик обрўсига дахл қиладиган мурожаат бўйича амалдаги қонунчилик ҳужжатларига мувофик ўзини химоя қилишга, Комиссияга зарур материаллар ҳамда бошқа ахборотларни тақдим этишга ҳақли.	
3-босқич	Комиссия	1. Мажлис яқуни бўйича ходимнинг характеристларида одоб-ахлоқ қоидаларининг бузилиши фактининг мавжудлигини ёхуд мавжуд эмаслиги тўғрисида қарор қабул қиласди. 2. Одоб-ахлоқ қоидалари бузилганлиги факти аникланган тақдирда ходимга куйидаги ахлоқий таъсир чораларини кўллайди: огоҳлантириш; узр сўраш ёки расмий узрнома келтиришни талаб қилиш; ҳокимлик мажлисида танбеҳ бериш. 3. Ходимга нисбатан интизомий таъсир чорасини кўллаш учун вилоят ҳокими номига тақдимнома киритиши мумкин. 4. Қабул килинган қарор ҳақида мурожаат қилувчига, ўзига нисбатан масала кўриб чиқилган ходимга ва вилоят ҳокимига ёзма равишда маълум қиласди.	Мажлис ўтказиладиган кун
4-босқич	Комиссия	Одоб-ахлоқ қоидалари вилоят ҳокими томонидан бузилган тақдирда уларга нисбатан тегишли чора кўриш масаласи юзасидан тақлифларни Ўзбекистон Республикаси Президенти Администрацияси раҳбарига юборади.	Заруратга кўра
5-босқич	Ходим	Комиссиянинг қарори устидан вилоят ҳокимига ёки судга шикоят қилиш мумкин.	Заруратга кўра

Navoiy viloyat hokimining  
2022 yil 22 oktabrdagi  
202-5-0-Q/22-son qaroriga  
3-ilova

## **Навоий вилояти ҳокимлиги одоб-ахлоқ комиссияси**

### **ТАРКИБИ**

<b>Т/Р</b>	<b>Ф.И.Ш.</b>		<b>Лавозими</b>
1.	Т.Атамуродов	-	Вилоят ҳокимининг биринчи ўринбосари, комиссия раиси
2.	Р.Ҳайдаров	-	Вилоят ҳокимлиги ташкилий-кадрлар гурухи раҳбари, комиссия раисининг ўринбосари
3.	М.Каримов	-	Вилоят ҳокимлиги ташкилий-кадрлар гурухи бош мутахассиси, комиссия котиби
<b>комиссия аъзолари:</b>			
4.	Б.Бобомуродов	-	Вилоят ҳокимининг ўринбосари
5.	А.Махмудалиев	-	Вилоят ҳокимининг ўринбосари
6.	Я.Душанов	-	Вилоят ҳокимининг ўринбосари
7.	F.Мусурманов	-	Вилоят ҳокимининг ўринбосари
8.	М.Мамадијрова	-	Вилоят ҳокимининг ўринбосари
9.	С.Мирзаев	-	Вилоят ҳокимининг ўринбосари
10.	Ғ.Яхшиликов	-	Вилоят ҳокимининг маҳаллий саноатни ривожлантириш масалалари бўйича ёрдамчиси
11.	Ж.Ҳамроев	-	Халқ депутатлари Навоий вилояти кенгаши котибияти мудири
12.	С.Шамшиев	-	Вилоят ҳокимлиги Ишлар бошқарувчisi
13.	Ф.Казаков		Вилоят ҳокимлиги юридик хизмати бошлиги
14.	Ж.Бобомуродов	-	Вилоят ҳокимлиги ахборот таҳлил гурухи раҳбари
15.	А.Қувондиқов	-	Вилоят ҳокимлиги Ишлар бошқармаси девонхона мудири
16.	М.Нуруллаев	-	Вилоят ҳокимлиги Жамоат ташкилотлари ва диний ташкилотлар билан алоқалар бўйича котибияти мудири
17.	Қ.Абдуазизов	-	Вилоят ҳокимлиги бош мутахассиси

**Изоҳ:** Вилоят ҳокимлиги одоб-ахлоқ қоидаларига риоя этилишини кўриб чиқшии комиссияси аъзолари таркибидаги шахсларнинг эгаллаб турган лавозимлари ўзгарган тақдирда, уларнинг ўрнига янги тайинланган ёки тегишили функцияларни амалга ошириши зиммасига юклангандар шахслар хизмат лавозими бўйича ушибу комиссиянинг аъзоси ҳисобланади.